


Kerwe ≈  
Spruch

1984



KERWEBORSCH VUMM  
HESSISCHE HOF

## Kerwespruch 1984

Grieß Gott, Gure unn Hallo,  
aach desjohr soin mer wirrer do,  
mer Borsch aus unserm Kaff,  
mache aach in diesem Johr de Aff,  
woans im goanze Ort nooch Quetschekuche rischt,  
de Monfred unser Kerwebier oasticht,  
woann Jung unn Alt goanz zabblich wern,  
hot goanz Worfelle nur oans im Hern,  
do werd die Kerb gefeiert wie sich`s geheert,  
do werd so moanches Fäßje Bier geleert,  
- beim Monfred ess die Stimmung groß,  
bei Schnitzel mit Pommes Frites unn Soß,  
de goanze Soal steht uff de Disch,  
die Lisbeth duht schwitze in de Kisch,  
de Monfred kann koum noch laafe,  
vumm veele Geld uff de Speicher schlaafe,  
awwer die Kerweborsch die soin unn bleiwe fit,  
drum ehr Leit kummt singt mol mit,  
unn die Musik speelt uns wie noch nie,  
es Lied vunn de Worfeller Kerwekompanie.



Aach desjohr gab`s enn haufe Leit,  
die hatte fer Dummheite`ne Menge Zeit,  
die honn sich onn` Spruch vumm letzte Johr gehalte,  
warn vunn Bolze net zurückshalde,  
honn mit Oisatz unn mit Dabbischkeit,  
uns enn lustsche Kerwespruch bereit,  
des soin Leit die mer im Ort duht kenne,  
mer duhn`se aach beim Nohme nenne,  
awwer ehr Dabesse duht eich nix draus mache,  
woann die Leit iwwer eier Bolze lache,  
denn die, die hier die Klapp uffreibe,  
dehn sich oam liebste in de Hinnern beiße,  
denn mer honn se net in unserm Spruch,  
ehr Bosse warn fer uns net gut genuch.




Bevor ich jetzt zum richtsche Spruch duhn kumme,  
werd erst`mol en Schluck Woi genumme !


E komisch Renne hot bei uns stattgefanne,  
do honn sich zwaa Dabbese geschunne,  
de oane hot zum liewe Gott enn gure Droht,  
de oaner backt de Leit ehr täglich Brot,  
- wie des hald ob unn zu bassiert,  
honn die mi`noanner diskudiert,  
in de Hitz donn vumm Gefecht,  
schwetzt mer aach moal schlecht,



schnell ess e falsch Wort gefalle,  
schunn will oam oaner e paar knalle,  
do segt des Schoaf doch zu soim Hert,  
" Du kriegst glei e paar `noi gezerrt ",  
doch der moant: " Gewalt ess net moi Sach ",  
sunst krieg ich mit moim Hergott Krach,  
um die Wett se `renne, des wär gerecht,  
wer donn erster ess, der hott aa Recht,  
donn soim se um ehr Recht geflitzt,  
honn ehrn Alkohol erausgeschwitzt,  
de Bäcker ess groad um die Eck geboue,  
do ess de Parre uff die Noas gefloue,  
wie der do soim Saldo iwwer`s Audo macht,  
stellt sich de Bäcker newedro unn lacht,  
der hot `en donn groad leije losse,  
ess zurick unn hot soim Siech genosse,  
doch oam Ziel do war `er Baff,  
do steht vor `em - de Paff,  
der hat mi `m uffsteije sich beeilt,  
ess donn um de Block gekeilt,  
unn war als erster wirrer dort,  
om sogenonnte Ausgangsort,  
ehr Leit was hat der sich geschunne,  
awwer Hauptsach `er hot gewunne,  
unn die Musik speelt jetzt laut eraus,  
" Muß i denn zum Städele hinaus?!"




Aach die Bolizei fer unsern Ort,  
meld sich hier zu Wort,  
die interessiert sich fer alle Leit,  
wo in Worfelle in letzter Zeit,  
bei Noacht- unn bei Newwelaktione,  
die Leit beklaut honn die do wohne,  
die gemopst honn was net Niet- unn Naachelfest,  
Auduradios, Mercedesstern unn oanern Mest,  
- sogar Hinggel honn `se mitgenumme,  
die soim schoin`s uff de Giggel kumme,  
honn die doch, des ess e Schoann,  
de Millobfuhr ehrm beste Moann,  
wie der im Urlaab vunn soim Vehzeig hot getroamt,  
dehoam soi Hinggelkäste ausgeroamt,  
nur e Gluck hann `se em Friedel noch gelosse,  
die hot gebriet, ehr Leit des soim koa Bosse,  
wie donn de Balzer, om nächste Doach,  
enoi ess in de Hinggelsschloach,  
do hot `sen fast erschloue,  
was ich soach ess net geloue





vunn 20 Hinggel warn 19 net me do,  
sowoas hann die unserm Friedel ogedoh,  
- woas e Glick hat'er noch die Gluck mit Ei,  
sunst wär's Aus gewese mit de Hinggelszicherei!

Jeder Mensch, des ess hald so,  
muß täglich uff de Klo,  
- oaner vunn de Speelmonnsleit,  
hat dodefehr dehoam koa Zeit,  
der war owends noch bei unserm Werrt,  
unn hôt sich e paar Biercher noigzerrt,  
er wollt groad onn soim letzte nippe,  
do muß er beim Monfred uff de Dippe,  
schnell enoi, die Hose runner,  
es duht enn Schloach wie Blitz unn Dunner,  
sofort verbreit sich do enn üble Duft,  
drum wollt'er naus onn die frisch Luft,  
doch, wie des schunn öfter's ess bassiert,  
hot sich die Deer koa Stiggelche geriert,  
die war zu unn ging net me uff,  
do saß'er oigespert uff'em Aabe druff,  
loangsam brach bei ehm die Panik aus,  
faste Stunn long greischt'er: " Loßt mich eraus ",  
wie des unsern Monfred hat kapiert,  
hot'er des glei ausbrowiert,  
doch soi Mieh die war umsunst gewese,  
drum hot'er im Telefonbuch noachgelese,  
um enn Schroiner zu bestelle,  
denn des ess der Monn fer solche Fälle,  
er schmeißt de Hoinz aus soim Bett eraus,  
unn segt: " Ich geb der oaner aus,  
mach die Klodeer bei mer bitte uff,  
denn de Lothar sitzt noch uff'em Aabe druff ",  
- korz denooch, do ess'er aa schunn kumme,  
er hat sogar soi Werkzeich mitgenumme,  
im Nu war de Lothar donn befreit,  
ess wurd jo aa schunn höchste Zeit,  
woas e Glick ess dem Speelmonn nix bassiert,  
sunst wär'er heit net mitmaschiert.




Moi Käl ess stawisch, ich honn enn Brond,  
drum nemm ich jetzt moi Gläsje in die Hond,  
unn die Musik speelt, ess werd aa Zeit,  
" Ein Prosit der Gemütlichkeit ".



Mer werd älder, s'läßt sich net vemeide,  
so moanch oaner muß donn drunner leide,  
mer heert net richtisch, sieht net me genaa,  
geht owends net me on die Fraa,  
die Hoarn gehn aus, mer kriegt e Platt,  
unn denkt wieveel mer frijer hat,  
net onnerschts ess'es mi'm Gebiss,  
woann mer iwwer ferzisch is,  
- weil koaner gern uff de Felge kaut,  
kriegt er falsche Zeeh gebaut,  
aach es Gebiss vunn's Oinehmers eHrm Schorsch,  
wurd' mit de Zeit moal morsch,  
zum Zeehdokder war'er donn bestellt,  
hot neije Zeeh kriegt fer veel Geld,  
er hot gedenkt: " Fer so veel Geld, des ess gewiß  
muß des ewisch halde, des Gebiss ",  
doch schunn korz denoch, nooch e paar Woche,  
es'es in de Mitt gebroche,  
just omm selwe Dooch wollt'er enn Ausfluuch mache,  
dem arme Schorsch war wirklich net zum lache,  
ehr Leit-do war'er goanz schee uffgeschmesse,  
denn ohne Zeh do konnt'er doch nix esse,  
- daß er clever ess waas jeder der'en kennt,  
de Schorsch ess niwwer in die Drogerie gerennt,  
hot gefregt ob er trotz Wochenend,  
e Fläschje Superkläwer krije kennt,  
donn ess'er wirrer Hoam gedabbt,  
unn hot soi nei Gebiss gebabbt,  
de Kläwer legt'er - do bleibt'er frisch,  
in de Kielschroank vunn de Kisch,  
unn soi Fraa die konnt aa wirrer lache,  
jetzt konnte'se ehrn Ausfluuch mache.

S'ess warm, woas duhn ich schwitze,  
Kamerad schenk oi, sunst du ich uff'em trockne sitze!  
Unn jetzt speele uns die Speelmonnsleit,  
" So enn Dooch, so wunderschee wie heit ".

E doll Ding hot neilich oaner gedreht,  
der vumm Ackerbau ebbes versteht,  
der fährt beim Dornemer Verbond,  
Mähdrescher iwwer's Ackerlond,  
er hält sich zur Erntezeit,  
ständig fern Verbond bereit,



unn hockt öfters bis zu zeije Stunn`,  
uff soim Mähdrescher erumm,  
er mäht Hawwer, Summergärscht unn Korn,  
die Sunn schoint`em de goanze Dooch uff de Knorrn,  
koa Wunner, daß donn sowoas ess bassiert,  
woas mer hier in kurzem Vers nodiert,  
- er sollt em Longedorfs Horst soi Gärscht obmache,  
ehr Leit jetzt fongt net glei o zu lache,  
stattdesse hot`er, wie konnt sowoas nur gescheije,  
oagefoange em Schmied soin Hawwer obzumäije,  
der hat die Gärscht mi`m Hawwer glatt vewechselt,  
unn hot em Philip soi Hawwerstroh gehähselt,  
die Frucht die hot`er uff`em Horst soi Roll geleert,  
woas war de Philipp platt, wie`er des geheert,  
der hot gedenkt: " Woas war donn des`fer Peif,  
der Hawwer ess doch noch gar net reif?!" ;  
- Jetzt steht`er do soin Hawwer es noch grie,  
vergäwens war em Schneirerkunroads-Hons soi Mieh.

Des war`s ehr Leit, s`ess genuch,  
zuend geht jetzt moin Kerwespruch,  
de Mund ess trocke, die Zung` verfronzt,  
heit owend werd beim Monfred noch gedonzt,  
do leije sich fer eich,  
die Kerweborsch ins Zeich,  
oans des ess doch jetzt schunn kloar,  
s`werd genauso schee wie im letzte Johr,  
do werd geschunkelt, gesunge unn gelacht,  
bis das die goanze Werdschaft kracht,  
drum schließ eich uns schnell o,  
woans haast " DIE WOFELLER KERB ESS DO "

